

助

字

辨

略

助字辨略卷四目錄

去聲

用

共

痛

至

誤

類

泊

肆

縱

重

音

翅通

致

遂

備

暨

古作臽

比

自

地

試

亟

意

次

被

未

貴

爲

謂

旣

庶

與

遽

渠通

詎

鉅距巨渠通距附

務

具

屢

屢婁通

故

固

顧

素

慮

第

逮

繼

逝

噬

泰

古作太省太與大通

大

蓋

通作蓋

奈

耐通

會

最

載

再

在

差

分

信

僅

慙

振

鎮

願

頻

漫

問

見

荐

算

便

旋

徧

要

較

覺通

稍

料

告

到

暴

箇

个同

些

麼

那

乍

藉

借同

諒

亮通

向

嚮通

當

尚

上通

況

古作况

浪

長

竟

更

正

政通

令

幸

徑

定

賸

剩同

應

又

驟

就

任

瞥

助字辨略卷四

確山劉洪武仲

用 廣韵云以也易屯彖勿用有攸往言無以有所  
往也書大禹謨好生之德洽於民心茲用不犯於  
有司論語怨是用希茲猶是也茲用是用竝是以  
之辭也後漢書鄧晨傳光武戲曰何用知非僕也  
竇憲傳何用愈趙高指鹿爲馬馬援傳先生奚用  
相濟韓退之詩李杜文章在光焰萬丈長不知羣  
兒愚那用故謗傷何用奚用那用竝何以之辭也  
又史記越世家王前欲伐齊員彊諫已而有功用



是反怨用是猶云因此也又周語民用莫不震動  
恪恭於農左傳僖公二十六年我敝邑用不敢保  
聚陸機辨亡論大業未就中世而隕用集我大皇  
帝諸用字猶云爰也國語注以民用爲田器恐非  
用卽用是但云用者省文也

縱 設辭猶云卽也論語且予縱不得大葬史記呂  
后紀諸君縱欲阿意背約何面目見高帝地下又  
左傳昭公七年縱吾子爲政而可此縱字亦是設  
辭猶云若也又省作從左傳宣公二年從其有皮  
丹漆若何

共 廣韵云同也皆也漢書高帝紀父老乃帥子弟  
共殺沛令原涉傳大郡二千石死官賦歛送葬皆  
千萬以上妻子通其受之通共重言也又李義山  
詩春心莫共花爭發此共字猶與也竝也

重 廣韵云厚也戰國策今富彊能而公重不相善  
也是兩盡也注云重猶甚也愚按重者輕之對相  
惡最深至非輕惡之故重得爲甚猶今俗云箸實  
也禮記檀弓壹似重有愛者太史公報任安書重  
爲天下觀笑杜子美詩君臣重修德猶足見時和  
諸重字其義竝同又離騷紛吾既有此內美兮又

重之以修能此重字猶加也益也漢書文帝紀是重吾不德也師古云重謂增益也蘇武傳見犯廼死重負國師古云言被匈奴侵犯然後廼死是爲更負漢國愚按更亦益也又戰國策羣臣必多以臣爲不能者故王重見臣也注云重難也漢書孔光傳上重違大臣正議師古云重難也愚按輕故易重故難也又古詩行行重行行此重字猶云復也再也又也凡稱物之重複者其重字讀作平聲如禮器天子之席五重是也若事之旣已爲之又更爲之其重字則讀作去聲故鄭重之義爲頻仍

也

痛 漢書食貨志畜積餘贏以稽市物痛騰躍晉灼  
云痛甚也

啻 與翅通僅也止也第也但也書秦誓不啻若自  
其口出孟子奚翅色重今多有訓不啻爲不異者  
非也或問莊子大宗師陰陽於人不翅於父母非  
不異之云乎曰此言人於陰陽惟所陶鑄不但如  
父母鞠育而已且陰陽所以生父母者若云父母  
之鞠育不異於陰陽可也云陰陽之陶鑄不異於  
父母則俱矣

至 最也極也荀子正論篇湯武者至天下之善禁  
令者也漢書賈誼傳材之不逮至遠也又大學自  
天子以至於庶人此至字猶及也又論語至于犬  
馬皆能有養孟子至於心獨無所同然乎至于者  
相及而殊上事之文也又漢書霍去病傳顧方略  
何如耳不至學古兵法不至猶俗云不到得也又  
漢書東方朔傳至非守宮卽蜥蜴師古云揚雄方  
言云其在澤中者謂之蜥蜴故朔曰是非守宮卽  
蜥蜴也愚按師古蓋訓至爲是至是音相近也  
致 與至通極也荀子勸學篇故君子隆師而親友

以致惡其賊世說西山朝來致有爽氣

誕 大學太甲曰顧誕天之明命朱注云誕猶此也  
遂 儀禮聘禮君與卿圖事遂命使者鄭注云遂猶  
因也春秋僖公四年遂伐楚穀梁傳云遂繼事也  
桓公七年祭公來遂逆王后于紀公羊傳云遂者  
何生事也何休云生猶造也專事之辭愚按遂云  
專事者言祭公不待更受命因其來魯遂迎后於  
紀亦繼事之辭也又史記高帝紀及高祖貴遂不  
知老父處顏氏家訓子雲歎曰此人後生無比遂  
不爲世所稱亦是奇事此遂字猶云終竟也又史

記高帝紀項羽雖聞漢東既已連齊兵欲遂破之而擊漢此云遂者是欲直竟其事與上義別也

類

戰國策主類欲令若爲之注云類似也史記酷

吏傳上問湯曰吾所爲賈人輒先知之是類有以吾謀告之者類似也若也疑辭也又史記伯夷傳巖穴之士趨舍有時若此類名湮沒而不彰此類字猶率也趨舍有時若此句絕言巖穴之士趨義舍利有時若伯夷顏淵而大率皆名湮沒而不彰也今多讀作如此類非此與漢書賈誼傳夫移風易俗使天下回心而鄉道類非俗吏之所能爲也

後漢書郅壽傳冀部屬郡多封諸王賓客放縱類  
不檢節諸類字義同郅傳注云類猶皆也頗爲近  
之

備 廣韵云具也皆也漢書禮樂志安世房中歌曰  
熙事備成韋穀才調集序并諸賢達章句不可備  
錄各有編次

泊 廣韵云及也顏氏家訓泊於梁氏茲風復闢  
暨 爾雅云逮及暨與也郭注云公羊傳曰會及暨  
皆與也逮亦及也又爾雅云暨不及也郭注云公  
羊傳曰及我欲之暨不得已暨不得已是不得及



邢疏云案春秋隱元年三月公及邾婁儀父盟于昧公羊傳曰及者何與也會及暨皆與也曷爲或言會或言及或言暨會猶最也及猶汲汲也暨猶暨暨也及我欲之暨不得已也然則暨者非我欲之事不獲已而爲會者也故云不及也又吳志大帝傳性多嫌忌果於殺戮暨臻末年彌以滋甚暨臻猶及至也又與息通虞書皋咎繇今文尙書作暨

肆

爾雅云肆故今也邢疏云詩大雅縣篇云肆不殄厥愠毛傳云肆故今也卽以肆之一字爲故今

因上起下之語書湯誥肆台小子蔡傳云肆故也  
又虞書肆類於上帝孔傳云肆遂也正義云肆是  
縱緩之言此因前事而行後事故以肆爲遂也

比 及也詩大雅比于文王其德靡悔比于猶至于  
也禮記祭義比時具物陳氏集說云比時及時也  
又魏志鄧艾傳宜權停畱須來秋冬比爾吳亦是  
平蜀志王平傳若賊分向黃金平率千人下自臨  
之比爾問涪軍行至此計之上也比爾猶云及此  
時也又論語比及三年比及重言也又孟子願比  
死者一洒之朱注云比猶爲也又漢書賈誼傳故

曰聖人有金城者比物此志也師古云言聖人厲此節行以御羣下則人皆懷德戮力同心國家安固不可毀拔若金城也愚按比物猶言人人上文云上設廉耻禮義以遇臣故臣亦以節行報上文兄之臣則誠死宗廟法度之臣則誠死社稷輔翼之臣則誠死君上守圉扞敵之臣則誠死社稷封疆人人懷此志自然國家安固如金城也又禮記王制諸侯之於天子也比年一小聘陳氏集說云一比年每年也又漢書食貨志永始二年梁國平原郡比年傷水災人相食師古云比頻也哀帝紀郡

國比比地動師古云比比頻頻也後漢書光武紀  
比陰陽錯謬日月薄蝕比猶比年省文也

自爾雅云由從自也郭注云自猶從也邢疏云自  
亦從也轉互相訓也詩關雎序南言化自北而南  
也鄭箋云自從也史記馮唐傳父老何自爲郎崔  
浩云自從也愚按此言從何出身爲郎也韓退之  
答劉正夫書要若有司馬相如太史公劉向揚雄  
之徒出必自於此不自於循常之徒也必自於此  
言必由於此溫飛卿詩目昔自西濱得蘭數本移  
栽於庭亦旣逾歲而芄然蕃殖自余游者未始不

以芳草爲遇矣自余游言從余游也蔣捷金盞子  
詞自從信誤青鸞想籠鸚鵡停喚自從重言也又書  
臯陶謨自我五禮有庸哉孔傳云自用也正義云  
自由也由是用故自爲用也又左傳成公十六年  
自非聖人外寧必有內憂史記律書自含血戴角  
之獸見犯則校而況於人懷好惡喜怒之氣禮書  
白子夏門人之高第也猶云出見紛華盛麗而悅  
入聞夫子之道而樂而况中庸以下漸漬於失教  
被服於成俗乎范曄傳自非然者臣願得少賜游  
觀之聞漢書刑法志今律令煩多而不約自典文

者不能分明而欲羅元元之不逮斯豈刑中之意  
哉食貨志自天子不能具醇駟而將相或乘牛車  
後漢書皇后紀自非供陵廟稻粱米不得導擇蜀  
志楊戲傳又時人謂譙周無當時才少歸敬者唯  
戲重之嘗稱曰吾等後世終自不如此長兒也世  
說注此間自有伏龍鳳雛王仲初詩自是桃花貪  
結子李義山詩猶自君王恨見稀諸自字竝是語  
助不爲義也按說文自亦作白解云此亦自字省  
白者詞言之氣從鼻出與口相助也然則白本是  
語聲故用爲助句也又周書庾信傳唯王褒頗與

信相埒自餘文人莫有逮者自餘猶云其餘此自字亦語之助也

地 漢書丙吉傳西曹地忍之李奇云地猶第也師古云地亦但也語聲之急耳愚按地與第音同故通也又王仲初詩楊柳宮前忽地春此地字語助也

試 莊子齊物論雖然嘗試言之郭注云以其不知故未敢正言試言之耳史記周本紀梁井戍周也將伐周也王試出兵境外以觀之荆燕世家太后曰試爲我言田漢書賈誼傳陛下何不壹令臣得

孰數之於前因陳治安之策試詳擇焉試猶且也  
且嘗之故云試也

亟 左傳隱公元年亟請於武公僖公二十七年臣  
亟聞其言矣杜注竝云亟欺冀反數也

意 史記封禪書公孫卿曰黃帝時封則天旱乾封  
三年上乃下詔曰天旱意乾封乎孔子世家子路  
曰意者吾未仁邪人之不我信也意者吾未知邪  
人之不我行也漢書司馬遷傳太史公曰先人有  
言自周公率五百歲而有孔子孔子至於今五百  
歲有能紹而明之正易傳繼春秋本詩書禮樂之



際意在斯乎意在斯乎意卽意者皆疑辭想像之  
故云意也又史記魯仲連傳亡意亦捐燕棄世東  
游於齊乎亡亦疑辭云亡又云意者重言也又蔡  
中郎難夏育上言意者高祖乃忍平城之耻呂后  
甘棄嫚書之詬於是何者爲甚此意者猶云試思  
之也又史記平準書天子始巡郡國東渡河河東  
守不意行至世說張華見褚陶語陸平原曰君兄  
弟龍躍雲津顧彥先鳳鳴朝陽謂東南之寶已盡  
不意復見褚生不意者非意所及也猶今云不料  
得也

次 皮襲美詩等閒遇事成歌詠取次衝筵隱姓名  
取次猶造次次者舍止之所也取者僅足之辭論  
語朱注云造次急遽苟且之時蓋以所造之次非  
從容暇豫之時僅僅舍止而已也

被 白香山詩常被老元倫格律王仲初詩弟子名  
中被點齋被者爲其所如何也

未 易臨卦九二象曰咸臨吉无不利未順命也程  
傳云未者非遽之辭孟子或問勸齊伐燕有諸曰  
未也仲子所食之粟伯夷之所樹與抑亦盜跖之  
所樹與是未可知也史記侯贏曰人固未易知古

人用字之意皆如此今人大率用對已字故意似異然實不殊也愚按如左傳文公元年子上曰君之齒未也杜注云言尙少此爲非遽之辭也如孟子云未也直是無辭耳

貴 戰國策貴合於秦以伐齊注云貴猶欲也

爲 猶因也孟子爲其象人而用之也史記李斯傳臣欲諫爲位賤又論語爲人謀而不忠乎此爲字猶與也凡心嚮其人曰爲如史記呂后紀爲呂氏者右袒爲劉氏者左袒是也又戰國策司馬翦謂楚王曰何不封公子咎而爲之請太子注云爲猶

助也愚按助亦與也

謂論語子謂子賤子謂仲弓子謂者利舉其人非必對其人而與之言也又詩國風豈不夙夜謂行多露小雅謂天蓋高不敢不跼謂地蓋厚不敢不踣此謂字語辭猶言曰也又周語謂君其何德之布以懷柔之使無有遠志世說謝公云許謨定命遠猶辰告謂此句偏有雅人深致此謂字猶云以爲也又孟子生之謂性又云此之謂大丈夫之謂猶云是謂俗云喚作何物也又孟子維心之謂與此之謂與上義別言操之則存舍之則亡出入無

時而莫知其鄉者是乃心之說也又戰國策謂齊王曰王何不以地齎周最以爲太子也注云凡言謂言爲而不人失之也愚按不知其人直云謂者猶言或謂也又大學所謂修身在正其心者所謂齊其家在修其身者此所謂在首句欲有所訓釋故舉前文以發之也左傳隱公三年且夫賤妨貴少陵長遠間親新聞舊小加大淫破義所謂六逆也君義臣行父慈子孝兄愛弟敬所謂六順也此所謂在末句訓釋已審結正上文也又漢書高帝紀高祖爲亭長乃以竹皮爲冠令求盜之薛治時

時冠之及貴常冠所謂劉氏冠也此言劉氏冠是  
國家制度人當知之而其制度所原起或未之知  
故云此竹皮冠卽所謂劉氏冠者也凡此皆是引  
證之文又左傳文公二年是以魯頌曰春秋匪懈  
享祀不忒皇皇后帝皇祖后稷君子曰禮謂其后  
稷親而先帝也詩曰問我諸姑遂及伯姊君子曰  
禮謂其姊親而先姑也謂其言其也亦訓釋之文  
旣 書堯典九族旣睦孔傳云旣已也吳志諸葛恪  
傳昔戰國之時諸侯自恃兵強地廣互有救援謂  
此足以傳世人莫能危恣情從懷憚於勞苦使秦

漸得白大遂以并之此既然矣既然猶云固然言此乃前事已然之效也又繁欽與魏文帝賡胡欲倣其所不知尙之以一曲巧竭意置既已不能既卽已也既已重言也世說韓豫章遺絹百匹不受減五十匹復不受如是減半遂至一匹既終不受既終猶云終已亦重言也又漢書郊祀志易有八卦乾坤六子水火不相遞需風不相諄山澤通氣然後能變化既成萬物也師古云既盡也又詩小雅吉日維戊既伯既禱又云既張我弓既挾我矢大雅慶既令居此既字語辭猶乃也既得爲乃者

既固也固乃也轉相訓又韓退之雜說易曰雲從龍既曰龍雲從之矣既曰猶云固曰言易本文固云龍必雲從之也

庶 廣韵云冀也幸也庶幾也書洛誥予惟曰庶有事論語曰也其庶乎易繫辭顏氏之子其殆庶幾乎後漢書袁紹傳實庶一捷之禍以立終身之防潘岳閒居賦於是覽止足之分庶浮雲之志

與 孟子此又與於不仁之甚者也朱注云與猶助也愚按與猶共也同也若云干與也如漢書高帝紀兵不得休八年萬民與苦甚如淳云與音相干



與之與是也

遽 遂也史記越世家何遽不爲福乎甘茂傳君其  
試臣何遽斥乎左太冲魏都賦奚遽不能與之踵  
武而齊風李善注引韓子曰雖厚愛之奚遽不亂  
又左傳襄公三十一年我聞忠善以損怨不聞作  
威以防怨豈不遽止然猶防川顧氏補正云遽亟  
也又通作渠詩小雅夜如何其夜未央鄭箋云夜  
未央猶言夜未渠央也愚按未央言未遽已止  
也史記南越傳我居中國何渠不若漢索隱云漢  
書渠作遽

詎 與距巨鉅渠竝通荀子正論篇今俳優侏儒狎  
徒晉侮而不闔者是豈鉅知見侮之爲不辱哉史  
記張儀傳蘇君在儀寧渠能乎注云渠音詎索隱  
云古字少假借耳漢書高帝紀沛公不先破關中  
軍公巨能入乎師古云巨讀曰詎詎猶豈也愚按  
豈鉅寧渠竝重言也又班孟堅論秦始皇帝距之  
稱始皇正義云距音巨之至也愚按距遽通言遂  
至于稱始皇也又戰國策今王已用之於越矣而  
忌之於秦臣以爲王鉅速忌矣注云鉅詎通愚按  
此鉅字猶云何也言王何其速忌也鉅得爲何者

豈之轉也世說注庾赤玉曾問羨王公治何似詎  
是所長詎是猶云那是寧是也又陸士衡歎述賦  
彌年時其詎幾潘安仁悼亡詩爾祭詎幾時韓退  
之送侯參謀詩一別詎幾何忽如隔晨興此詎字  
猶云曾也章寧也寧曾也轉相訓又漢書食貨志  
元龜距冉長尺二寸孟康云冉龜甲緣距至也度  
背兩邊緣尺二寸也說文云距止也正字通云與  
距通書益稷予決九川距四海濬畎澮距川孔傳  
云距至也正義云距者和抵之名故爲至也愚按  
距川距海者言至于川至于海也龜距冉長尺二

寸者言自龜甲至緣相去有尺二寸也此爲相抵之辭耳與距川距海之義別

務 說文云趣也徐氏云言趣赴此事也愚按務者專力而必爲之故說文訓趣也書秦誓樹德務懋附惡務本左傳閔公元年君其務寧魯難而親之史記周本紀務在節儉

具 廣韻云備也史記蕭相國世家漢王所以具知天下阨塞戶口多少強弱之處民所疾苦者以何具得秦圖書也又詩小雅則具是違詩詰云具俱也

屢 廣韵云數也詩小雅屢顧爾僕又與屢集通漢書高帝紀後九月師古云據漢書表及史記漢本改秦曆之前迄至高后文帝屢書後九月宣帝親婁蒙嘉瑞獲茲祇福元帝紀婁勃公卿日望有故師古云婁古屢字

故 承上之辭猶云是以是故國語故能保世以滋太毛詩周南召南譜曰是故二國之詩以后妃夫人之德爲首終以麟趾騶虞正義云是故者緣上事生下勢之稱又禮記曲禮故君子式黃髮鄭注六發句言故明此衆篇雜辭也愚按此句文義與

上不屬故知是發語之辭與承上起下者別也又  
易繫辭是故夫象聖人有以見天下之賾而擬諸  
其形容象其物宜是故謂之象下是故是緣上事  
之辭上是故則發語之辭鄭氏所謂衆篇雜辭者  
也又管子則故施舍優猶以濟亂則百姓悅則故  
猶是故也又漢書高帝紀豐故梁徙也趙廣漢傳  
趙廣漢字子都涿郡蠡吾人也故屬河間此故字  
猶云本也故得爲本者故舊也又唐書吳兢傳張  
說謂曰劉生書魏齊公事不少假借奈何兢曰子  
平已臣不可受誣地下競實書之其草故在故在

猶云尙在凡云尙如何者皆有故舊之義也又漢書趙充國傳雖其前辭嘗曰得臣效五年宜以它心不足以故出兵世說王謂何曰我今故與林公來相君此故字猶云特也言特地爲此一事也又漢書景帝紀它物若買故賤賣故貴皆坐臧爲盜妄律文以有心爲故無心爲誤也杜子美詩清秋燕子故飛飛此故字亦有心之辭又史記趙世家秦服其勞而趙受其利雖強大不能得之於小弱小弱故能得之於強大乎世說卿故復憶竹馬之好不又云故當是其妙處不傳又云同歸故鄉有

才具又云使真長來故應有以制彼顏延之。若詠物故不可論途窮能無痛諸故字語助猶云乃也。又史記高帝紀項羽雖聞漢東既已連齊兵欲遂破之而擊漢漢王以故得助五諸侯兵遂入彭城以故猶言因是也。

固 戰國策齊固弱注云固信也愚按固信也實也孟子臣固知王之不忍也又云固所願也史記五帝紀周難爲淺見寡聞者道也刺客傳固去也吾笈者曰攝之倭幸傳力田不如逢年善仕不如遇合固無虛言漢書高帝紀良對曰楚兵且破未有



分地其不至固宜諸固字其義竝同又史記刺客傳今日之事臣固伏誅戰國策固作故固伏誅言固當伏誅此固字亦信辭也又虞書大禹謨禹拜稽首固辭孔傳云再辭曰固禮記殺彘主人曰枉矢啗彘不足辭也敢固以請鄭注云固之言如故也言如固辭者重辭也禮記少儀聞始見君子者曰某固願聞名於將命者鄭注云固如故也重則云固正義云再辭也不云初辭而云固者欲明主人不卽見已已乃再辭故云固也若初辭則不云固愚按此固字是心誠如此非有虛假之謂若訓

作再則少儀云始見君子豈可便云再願聞名邪  
又史記陳涉世家卒賣魚亨食得魚腹中書固以  
怪之矣蘇秦傳臨菑之中七萬戶臣竊度之不下  
戶三男子三七二十一萬不待發於遠縣而臨菑  
之卒固已二十一萬矣此固字猶旣也已也固以  
卽固已並重言也又周語固有之乎注云固嘗也  
又曲禮毋固獲陳注云固獲謂必欲取之也漢書  
周昌傳吾固欲煩公公彊爲相趙師古云固必也  
又晉語臣固聞之注云固久也又論語問天縱之  
將聖史記魯仲連傳鄒君死湣王欲入弔夷維子

謂鄒之孤曰天子弔主人必將倍殯棺設北面於南方然後天子南面弔也鄒之羣臣曰必若此吾將伏劍而死固不敢入于鄒張釋之傳文帝怒曰此人親驚吾馬吾馬賴和柔令他馬固不敗傷我乎後漢書來歷傳大臣乘朝車處國事固復懷轉若此乎此固字猶云乃也漢書衛青傳上曰我非忘諸校功也今固且圖之固且猶云乃將又史記魯仲連傳新垣衍快然不悅曰噫嘻亦太甚矣先生之言也先生又惡能使秦王烹醢梁王魯仲連曰固也吾將言之李斯傳高閑李斯以爲言乃見

丞相曰關東羣盜多今上急發徭治阿房宮聚狗  
馬無用之物臣欲諫爲位賤此眞君侯之事君何  
不諫李斯曰固也吾欲言之久矣鼂錯傳錯父聞  
之白潁川來謂錯曰上初卽位公爲政用事侵削  
諸侯別疏人骨肉人口議多怨公者何也鼂錯曰  
固也不如此天子不尊宗廟不安師古云固也言  
固當如此愚按固也猶云然也乃答語之聲不爲  
義也禮記檀弓有子曰然然則夫子有爲言之也  
然是應聲旣承問者先答而後告之也與論語雍  
之言然迫別固得爲然者固信也信然也轉相訓

如李斯承諫治阿房趙錯承侵削諸侯答云固當如此義似可通如魯仲連謂烹醢梁王乃是聳動之辭非理所當然豈可云固當如此乎

顧但也史記刺客傳吾每念痛於骨髓顧計不知所出耳漢書霍去病傳顧方略何如耳不至學古兵法師古云顧念也恐非如禮記祭統祭者澤之大者也是故上有大澤則惠必及下顧上先下後耳此顧字亦是但辭正義云言上有大澤惠必及下無不周徧但瞻顧之時尊上者在先卑下者處後耳一云顧故也謂若上先餞臣下後餞示恩則

從上起也訓故旣與上文不合而正義訓作瞻顧  
尤爲牽強又漢書季布傳且僕與足下俱楚人使  
僕游揚足下名於天下顧不美乎此顧字猶豈也  
又史記燕世家子之南面行王事而噲老不聽政  
顧爲臣索隱云顧猶反也漢書賈誼傳足反居上  
首顧居下師古云顧亦反也又史記伍子胥傳若  
旣得立欲分吳國與我我顧不敢望也屈原傳懷  
王竟聽鄭袖復釋去張儀是時屈平旣疏不復在  
位使於齊顧反諫懷王曰何不殺張儀張儀傳若  
善守汝國我顧且盜而城王翦傳今空秦國甲士

而專委於我我不多請田宅爲子孫業以自堅顧  
令秦王坐而疑我邪後漢書馬援傳卿非刺客顧  
說客耳諸此顧字與故通猶云乃也

素 漢書高帝紀高祖爲亭長素易諸吏師古云素  
故也謂舊時也愚按原其平日故云素也

慮 漢書賈誼傳慮亡不帝制而天子自爲者師古  
云慮大計也愚按大計猶云大率賈誼傳諸慮字  
皆是率辭如云一二指搖身慮無聊又云逐利不  
耳慮非顧行也又云至於俗流失世壞敗因恬而  
不知怪慮不動於耳目以是爲適然耳其義竝同

師古訓慮非顧行之慮爲念慮之慮恐非又荀子  
議兵篇其所以接下之百姓者無禮義忠信焉慮  
率用賞慶刑罰勢詐除阨其下獲其功用而已矣  
慮率重言也又漢書食貨志天下大抵無慮皆鑄  
金錢矣師古云無慮亦謂大率無小計慮耳愚按  
無慮者欲計並之不能悉猶云大率也大抵卽大  
抵大抵無慮者重言也趙充國傳亡慮二千人亡  
與無同後漢書光武紀初作壽陵將作大匠竇融  
上言園陵廣袤無慮所用注云無慮都凡也謂諸  
園陵都凡制度也愚按都凡猶云一切



第

漢書陳涉傳藉第令無斬而戍死者固什六七

蘇林云藉假第且也晉灼云酈食其傳第言之外

戚傳第一見我蘇說是也師古云晉氏意頗近之

而猶未得漢書諸言第者甚衆第但也語有緩急

耳言但令無斬也今俗語稱但者急言之則音如

第矣酈食其外戚傳所云第者皆謂但耳義非且

也愚按師古訓第爲但者以但爲空也徒也然第

字實兼但且二義如史記孫吳傳君第重射臣能

令君勝此第字但也且也索隱止訓爲且義不備

矣左太沖蜀都賦鳥鎩翮獸廢足殆而竭來相與

第如滇池集于江洲李善訓第爲且此言鳥獸見  
追逐無所於遁和與且如滇池集于江洲也若訓  
爲但不可通矣又如漢書司馬相如傳第如臨邛  
此第字竝是聊且之辭而師古云漢書諸第字竝  
宜訓但亦近狹也

逮 爾雅云及也禮記曲禮逮事父母則諱王父母  
不逮事父母則不諱王父母又左傳成公十三年  
昔逮我獻公及穆公相好戮力同心此逮字猶云  
及至也又漢書王莽傳克身自約糴食逮給師古  
云纔得相及僅足而已愚按相及非有餘之義故

逮得爲僅也

繼 書無逸繼自今嗣王則其無淫于觀于逸于游  
于田孔傳云繼從今已往嗣世之王皆成之正義  
云先言繼者謂繼此後人卽從今以後嗣世之王  
也愚按繼者相次之辭猶云比也孟子繼而有師  
命言見王之後相次有師命也

逝 詩國風逝不古處朱傳云逝發語辭

噬 詩國風彼君子兮噬肯適我朱傳云噬發語辭  
愚按逝噬音皆近是故得通爲發語之聲不爲義  
也

泰過甚也詩小雅昊天泰慄莊子漁父今子既上  
無君侯有司之勢而下無大臣職事之臣而擅飾  
禮樂選人倫以化齊民不泰多事乎又漢書高帝  
紀今漢有天下太半韋昭云凡數三分有二爲太  
半有一分爲少半愚按說文以太爲古泰字後省  
作太耳舊說謂范蔚宗父名泰凡後漢書泰字竝  
改作太夫私牘與史冊殊科家諱與國諱異致國  
諱將使方內避之不得不改雖改要自知某字元  
是某字雖異代要自可考而知之無猜意之者至  
于家諱但當避諸私牘而已豈可用之史冊令當

時後世猜意之乎緣泰太本來是一蔚宗適副其  
私願耳又通作太禮記曲禮童子不衣裘裳鄭注  
云爲大溫也陸德明音義云太音泰按陸氏以大  
本音代與泰非一音故云音泰則是經史諸太字  
竝從大者乃通假耳非大卽太也毛晃以爲古太  
字無點後人加點以別小大之太似非確論

大 盛也甚也詩大雅予懷明德不大聲以色此爲  
盛大之辭也孟子稽大不理於口史記田叔傳魯  
王以故不大出游此爲過甚之辭也又史記平準  
書於是商賈中家以上大率破大率辜較之辭也

又禮書至於高祖光有四海叔孫通頗有所增益  
減損大抵皆襲秦故應劭云抵至也臣瓚云抵歸  
也索隱云按大抵猶大略也臣瓚以抵訓爲歸則  
是大略大歸其義皆通於一漢書食貨志天下大  
且無慮皆鑄金錢矣師古云大氏猶言大凡禮樂  
志大氏皆因秦舊事焉師古云氏歸也其後字或  
作抵音義竝同愚按史記佞幸傳內寵嬖臣大底  
外戚世家大底卽大抵抵氏底以音同而通也又  
漢書王莽傳大歸言莽當代漢有天下云陳萬年  
傳具曉所言大要教咸調也大歸卽大要歸是收

束之所要爲總括之區也又孟子此其大略也史記貨殖傳此其大較也蜀志許靖傳注許文休者大較廊廟器也約略計之故云大較大較大略竝是大槩之辭又史記貨殖傳大體如此矣大體猶今云大段也後漢書袁術傳天命符驗可得而見未可得而言也然大致受大福者歸於信順乎大政與大體相近此致字與世說雅人深致之致同謂意度也又李山甫詩大都爲水也風流大都大凡也白大率以下雖義有微別然總之是都凡之辭也

蓋 郭景純爾雅序爾雅者蓋興於中古隆於漢氏  
邢疏云蓋興於中古者爾雅之作經傳莫言其人  
及時世但相傳云周公作之以教成王無正文故  
云蓋以疑之禮記檀弓舜葬於蒼梧之野蓋三妃  
未之從也孔疏云蓋者錄紀之人傳云舜時如此  
未知審悉故云蓋史記周本紀西伯蓋卽位五十  
年其囚羑里蓋益易之八卦爲六十四卦詩人道  
西伯蓋受命之年稱王而斷虞芮之訟後十年而  
崩諡爲文王改法度制正朔矣追尊古父爲太王  
公季爲王季蓋王瑞自太王興正義云自西伯蓋



一卽位五十年以下至太王興在西伯崩後重述其事爲經傳不同不可全棄故略而書之引次其下事必可疑故數言蓋也愚按改法度制正朔以下乃重述文王未崩以前事言旣嘗改法度制正朔追尊古公以來悉爲王者矣則是文王未崩之年已受命稱王也復云王瑞自太王興者以明古公以上不王之故也然此皆舊史傳聞不敢的以爲然又不可徒据他說削而去之使舊聞自我而湮故每云蓋以疑之如六十四卦非始於文王而世有謂文王始重八卦爲六十四卦者故云蓋蓋易

之八卦爲六十四卦也太史公每遇傳疑多用蓋字如封禪書上有所幸王夫人夫人卒少翁以方蓋夜致王夫人及寵鬼之貌云外戚世家衛皇后字子夫生微矣蓋其家號曰衛氏此以方士矯誣難信衛氏冒姓不可根究故竝云蓋也然則史記未嘗的言文王受命稱王始重八卦而難者頗以爲口實斯謂之粗中也又論語丘也聞有國有家者不患寡而患不均不患貧而患不安蓋均無貧和無寡安無傾或謂此蓋字乃承上之辭不知古未有訓蓋爲承上者近代科舉文字始用以爲承

轉耳此蓋字雖非疑辭然聖人之言婉而不直但言均和安有無貧無寡無傾之理而已不肯徑云均則無貧和則無寡安則無傾而加蓋字以緩其辭謙謙之象從可知也又漢書高帝紀蓋聞王者莫高於周文霸者莫高於齊桓此蓋字發語辭也又漢書郊祀志今鼎至甘泉以光潤龍變承休無與合茲中山有黃白雲降蓋若獸爲符師古云蓋發語辭也言甘泉之雲又若獸形以爲符瑞也愚按此蓋字疑辭也言雲氣似獸而已其實非獸故云蓋也又漢書禮樂志神夕奄虞蓋孔享師古云

蓋語辭愚按此蓋字在句中語助辭也又荀子哀公篇君出魯之四門以望魯四郊八國之虛則必有數蓋焉楊注云有數蓋焉猶云蓋有數焉倒言之耳愚按此蓋字亦是語助辭語助則或上或下各從所安本無定所不必專以蓋有數焉爲正文也又詩小雅我行旣集蓋云歸哉鄭箋云蓋皆也愚按此亦是語辭如云乃也孝經愛敬盡於事親而德教加於百姓刑于四海蓋天子之孝也此言孝德純至自內及遠而天下化之是乃天子之孝也正義云蓋者辜較之辭劉炫云辜較猶梗槩略

陳如此未能究竟也劉瓛云不終盡之辭按辜較者大率也義殊不近禮記檀弓季武子曰周公蓋祔此蓋字亦乃辭也正義云武子去周公不遠無可疑亦云蓋者意有謙退不敢指斥事雖不疑亦云蓋也故孝經夫子云蓋天子之孝也蓋諸侯之孝也非是不知謙爲疑辭陳氏集說云此記者言合葬之事古人未有因引季武子之言謂自周公以來始祔葬也按二說皆不得然陳爲近之始是然後之辭然後亦乃辭也又宋人表文率稱此蓋伏遇皇帝陛下此蓋猶云今乃也

奈 廣韵云如也書五子之歌爲人上者奈何不敬  
奈何猶云如何俗云爲甚也名誥曷其奈何弗敬  
曷其奈何重言也又素問帝曰余聞得共人不教  
是謂失道傳非其人慢泄天寶余誠非德未足以  
受至道然而衆子哀其不終願夫子保於無窮流  
於無極余司其事則而行之奈何此奈何猶云何  
如問可否之辭也漢書東方朔傳昔伯姬燔而諸  
侯憚奈何乎陛下奈何乎句絕朔以董偃私侍公  
主武帝復爲之置酒宣室故引伯姬之事以明之  
欲其比古自鑒旣云奈何又重稱陛下以歎之如

云陛下覽伯姬之事以爲何如也又楚辭九歌愁  
人兮奈何九辨君不知兮可奈何此奈何猶云如  
之何俗云怎樣是也可奈何者無可奈何若爲商  
較之辭也此類雖是無可如何然其語氣緩如史  
記周本紀太史伯陽曰禍成矣無可奈何匈奴傳  
邊人奴婢愁苦欲亡者多曰聞匈奴中樂無奈候  
望急何漢書王莽傳夫唐堯有丹朱周文王有管  
蔡此皆上聖亡奈何下愚子何此類語氣實直是計  
無復展無可如何也又史記留侯世家沛公大驚  
曰爲將奈何漢書高帝紀謂張良曰諸侯不從奈

何此奈何亦是如之何然有問計將安出之意與上殊也又姜夔琵琶仙詞奈愁裏恩恩換時節劉鎮漢宮春詞奈夢雲不到愁邊奈卽無奈省文也又音奴箇切韓退之詩人生誠無幾事往悲豈奈豈奈猶云如何耐得也又廣雅云奈那也愚按那何也李太白詩耐可乘流直上天耐與奈通耐可猶云那可也

會 廣韵云合也愚按合也者應也言應當也本是會合之會轉爲應合耳魏志崔琰傳注男兒居世會當得數萬兵千匹騎箸後耳顏氏家訓人生在



世會當有業會卽當也會當重言之也杜子美詩  
會須上番看成竹會須猶會當也又太史公報任  
安書會東從上來此會字猶適也會合有適然之  
義故得通爲適也又姜夔長亭怨慢詞樹若有情  
時不會得青青如此不會得猶云不解得方言也

最

廣韵云極也史記五帝紀諸侯咸來賓從而蚩

尤最爲暴漢書鄧吉傳中西域而立莫府師古云  
中西域者言最處諸國之中近遠均也惠按最處  
諸國之中者言處諸國之故中倒文也又史記周  
勃世家最從高帝得相國一人丞相二人將軍二

千石各三人索隱云最都凡也謂總舉其從高祖  
攻戰克獲之數也衛霍傳最驃騎將軍去病凡六  
出擊匈奴索隱云最凡計也愚按上云最下復云  
凡者重言之也

載 語辭也詩小雅皇尸載起韓退之南海神廟碑  
省牲之夕載陽載陰又詩周頌載用有嗣朱傳云  
載則也愚按則亦辭也又法言先知篇或曰載使  
子韋律曰吾不如弘恭注云載設也

再 左傳襄公二十四年公孫同乘兄弟也胡再不  
謀再猶更也此言鄭公孫射犬御晉張骼輔驃致

師于楚憾二子待已無禮既近楚師不告而馳二  
子入壘收禽射犬又不待之而出兩窘急之故云  
再不謀也又魏志陳思王傳駢驂倦路再寢再興  
此再字與載通語辭也或云再猶屢也言行役非  
一朝夕也亦通

在 猶於也左傳襄公八年寡君在君君之臭味也  
吳志胡綜傳英雄俊傑上達之士莫不心歌腹詠  
樂在歸附若也在得爲於者詩國風于澗之中猶  
云在澗之中于得爲在故在亦得爲於也又孟子  
惡在其爲民父母也李義山詩好在青鸚武此在

字語助辭今蜀人語猶爾也又王仲初詩在先教示小千牛方言凡豫爲之曰在先如何也

差 釵去聲僅也略也後漢書光武紀今軍士屯田糧儲差積世說人問撫軍殷浩談竟何如答曰不能勝人差可獻酬羣心又漢書趙廣漢傳廣漢歎曰亂吾治者常二輔也誠令廣漢得兼治之直差易耳此差字猶云頗也

分 陳經國沁園春詞分歲晚誅茅湖上山分者若言分已定也今云揀得如此

信 廣韵云誠也愚按誠也實也允也果也史記田

齊世家若夫語五音之紀信未有如夫子者也又  
左傳桓公十八年人曰祭仲以知免仲曰信也此  
信字果辭猶云然也又論語信乎夫子不言不笑  
不取乎信乎者疑辭也又魏志華佗傳若妻信病  
賜小豆四十斛寬假限日此信字亦果辭也辭之  
未定與疑辭別

僅 廣韵云纔也少也劣也史記秦本紀夫自上聖  
黃帝作爲禮樂法度身以先之僅以小治又與勵  
莖塵竝通禮記射義序黜文揚觶而語曰好學不  
倦好禮不變旄期稱道不亂者不在此位也蓋勵

有存者漢書地里志豫章出黃金然董董物之所  
有取之不足以更費賈誼傳諸公幸者乃爲中涓  
其次塵得舍人師古云塵與僅同

懋 詩小雅皇父孔聖作都于向擇三有事亶侯多  
藏不懋遺一老俾守我王注疏訓懋爲心不欲自  
彊之辭言皇父不自強晉一人輔天子也左傳哀  
公十六年昊天不弔不懋遺一老杜注云懋且也  
愚按訓懋爲彊者爾雅之文也然詩言非勉強之  
義不如杜氏訓且爲安言聊且晉一老都不肯也  
又晉語伯宗之妻曰諸大夫莫子若也然而民不

能戴其上久矣難必及子子盍亟索士憖庇州犁  
焉注云憖顧也州犁伯宗子愚按此憖字亦是且  
辭言自保實難不如且庇其子也又左傳昭公二  
十八年祁盈之臣曰鈞將皆死憖使吾君聞勝與  
臧之死也以爲快杜注云憖發語之音愚按發語  
之音猶云寧也今云寧可有作去聲者其音乃近  
于憖也然此憖字訓作且亦通

振 爾雅云古也郭注云詩曰振古如茲猶云久若  
此邢疏云案周頌載芟云匪今斯今振古如茲毛  
傳云振自也鄭箋云振亦古也言修德行禮莫不

獲報乃自古而如此所由來者久非適今時是也  
愚按振古得爲自古者振作也凡創始者爲作此  
欲溯其所由來故謂之振古猶云自有天地以來  
也蓋當時語如此

鎮 李義山詩蠟花常遞淚箏柱鎮移心鎮常也鎮  
有定義故得爲常也

願 廣韵云欲也愚按心欲如此也詩國風願言思  
子漢書高帝紀願君王出武關

頓 遽然也世記庾風姿神貌陶一見便改觀談晏  
竟日愛重頓至世說汪高坐別傳性高簡不學晉



語諸公與之言皆因傳譯然神領意得頓在言前  
漫 水淫衍也唐人詩多用爲語助取其因任放浪

無所拘檢如水之漫嚴鄭公詩漫向江頭把釣竿  
是也又杜審言詩楊柳營前葉漫新此言柳色處  
處皆新如水之漫而莫禁也與上義別又李義山  
詩一名我漫居先甲千騎君翻在上頭此漫字與  
設通猶云虛也枉也徒也如萬楚詩西施設道浣  
春紗義山詩謾誇天險劍爲峰是也又杜子美詩  
漫勞車馬駐江干此漫字亦通謾猶云輕易也又  
杜詩忽漫相逢是別筵忽漫猶云率爾亦謾之轉

也

間 漢書文帝紀間者諸呂用事擅權師古云間者猶言中間之時也又景帝紀間歲或不登間歲云者言時復如此也又溝洫志襄絕水至斜間百餘里此言相去有百里也

見 漢書司馬相如傳先生又見客師古云見猶至也言至此國爲客也若今人自稱云見顧見眷耳愚按凡云見者加於我之辭也如史記平準書式何故見寃於人齊悼惠世家若反言漢已破矣趣下三國不且見屠漢書兒寬傳廷尉府盡用文史

法律之吏而寬以儒生在其間見謂不習事不習  
曹丙吉傳詔丞相御史問以虜所入郡吏吉具對  
御史大夫卒遽不能詳知以得譴讓而吉見謂憂  
邊思職又相如傳乃今日見教諸見字其義竝同  
見客者客於我所也見教者來教我也見冤者爲  
人所冤見屠者爲人所屠也見謂不習事見謂憂  
邊思職者蒙以不習事及憂邊思職之稱也若訓  
作至有不可通者矣又韓非說難所說出於爲名  
高者也而說之以厚利則見下節而遇卑賤必棄  
遠矣所說出於厚利者也而說之以名高則見無

心而遠事情必不收矣此見字卽漢書見謂之義  
省文也又韓退之黃州賊事宜狀臣自南來見說  
江西所發共四百人白香山詩見說白楊堪作柱  
按唐人多以聞說爲見說當時方言如此也又通  
作現漢書溝洫志許商以爲古說九河之名有徒  
駭胡蘇兩津今見在成平東光兩界中王嘉傳時  
見大夫無可使者師古云謂見在大夫皆不堪爲  
使也愚按見在謂當下可依據而指數者也但云  
見者省也

荐 廣韵云仍也再也左傳昭公十八年又懼讒慝

之間謀之以啓貪人荐爲敝邑不利杜注云荐重也愚按重去聲猶再也

算 猜意之辭猶料也姜夔揚州慢詞杜郎俊賞算如今重到須驚

便 卽也莊子達生善游者數能若夫没人則未嘗

見舟而便操之者也世說至便問徐孺子所在鍾

嶸詩品預此宗流便稱才子又魏志華佗傳應便

拔針病亦行差應便猶卽便也又世說殷咨嗟曰

僕便無以相異此便字猶云遂也竟也又假令之

辭猶云縱也陸獻瑞鶴仙詞便行雲都不歸來也

合寄將音信

旋 事非豫爲之也王仲初詩旋翻曲譜聲初起又  
范忠宣公義莊規矩劄子亦遂旋立定規矩令諸  
房遵守遂旋方言也言隨事特爲定立規矩也又  
旋旋猶漸漸也

偏 猶悉也詩小雅羣黎百姓偏爲爾德漢書賈誼  
傳若其它背理而傷道者難偏以疏舉

要 總舉之辭易繫辭亦要存亡吉凶則居可知矣  
史記漢興以來諸侯表臣遷謹記高祖以來至太  
初諸侯譜其下益損之時今後世得覽形勢雖強

要之以仁義爲本高祖功臣侯表帝王者各殊禮而異務要以成功爲統紀豈可混乎漢書司馬遷傳要曰彊本節用則人給家足之道也儒林傳要言易者本之田何又漢書西域傳西域諸國頗背叛匈奴欲大侵要死可殺校尉將人衆降匈奴如等云言匈奴來侵會當死耳可降匈奴也師古云要一妙反愚按要字固有會當之義然此云要死猶陳涉云等死若云總之是死不如降匈奴也又韓退之與孟東野書自彼至此雖遠要皆舟行可至答劉正夫書今後進之爲文能深探而力取之

以古聖賢人爲法者雖未必皆是要若有司馬相如太史公劉向揚雄之徒出必自於此不自於循常之徒也此要字猶云究竟也乃約其終竟之辭又世說孫興公作天台賦成以示范榮期云卿試搗地要作金石聲又云樂令善於清言而不長於手筆將讓河南尹請潘岳爲表潘云可作耳要當得君意韓退之論淮西事宜狀所以要先決於心詳度本末又云若未可深入則深壁高壘以逸待勞自然不要諸處多置防備論變鹽法事宜狀以此言之鹽法未要變也諸要字猶須也當也要當



猶要須重言也又李義山詩可要昭陵石馬來又云可要金風玉露時可要猶云何用也

較 比量之辭王仲初詩今日踏青歸較晚又通作覺世說魏武謂修我才不及卿乃覺三十里又云王東亭與石頭兄弟乘馬出郊時彥同游者連鑣俱進唯東亭一人常在前覺數十步

稍 說文云出物有漸也漢書溝洫志河東渠田廢予越人今少府以爲稍入師古云稍漸也其入未多故謂之稍也愚按諸書多訓稍爲漸未有宅訓也然此字實有兩義一爲漸辭一爲頗略之辭如

史記平準書初異爲濟南亭長以廉正稱稍遷至九卿漢書吳王濞傳軍遂潰往往稍降太尉條侯及梁軍禮樂志王者必因前王之禮順時施宜有所損益卽民之心稍稍制作又云河間獻王采禮樂古事稍稍增輯至五百餘事食貨志孔僅使天下鑄作器三年至大司農列於九卿而桑弘羊爲大司農中丞管諸會計事稍稍置均輸以通貨物此稍字漸也稍稍漸漸也如漢書周勃傳吏稍侵辱之袁盎傳上徵淮南王遷之蜀檻車傳送盎時爲中郎將諫曰陛下素驕之弗稍禁以至此今又

暴摧折之杜子美詩稍喜臨邊王相國肯銷金甲  
事春農此稍字頗也略也少也漸非遽然之辭故  
稍亦得爲少略也

料 意計之辭史達祖東風第一枝詞料故園不捲  
重簾誤了乍來雙燕

告 陶淵明感士不遇賦序自真風告逝大偽斯興  
告猶云也

到 及也至也史記律書孝文曰朕能任衣冠念不  
到此漢書翼奉傳如因丙子之孟夏順太陰以東  
行到後七年之明歲必有五年之餘蓄然後大行

考室之禮

暴 遽也史記項羽紀今暴得大名不祥王隱地道  
記長葛縣在潁川其社有樹暴長

箇 與个同庾子山鏡賦真成箇鏡特相宜箇方言  
此也皮襲美詩檜身渾箇矮渾箇猶云如此又韓  
退之詩老翁真箇似兒童此箇字語助也又王觀  
慶清朝慢詞晴則箇陰則箇箇得天氣有許多  
般則箇亦語辭也又左傳昭公三年又弱一个焉  
荀子負矢五十箇史記貨殖傳竹竿萬个凡稱一  
人一物爲一箇左傳云弱一个者謂公孫子雅卒

也王冷然詩河畔時時聞折柳客中無箇不沾裳  
無箇猶云無一箇省也唐鹿門詩若个傷春向路  
傍若个猶云誰何俗云那箇也章穎小重山詞身  
閒無箇事且登臨無箇事猶云無一件事此又以  
一件爲一箇也

些 廣韻云楚語辭方氏通雅云些之助辭猶斯也  
愚按些音袞去聲語已之辭猶云分也

麼 莫過切語餘聲也張泌江城子詞好是問他來  
得麼此與莫婆切者義同語緩則爲平聲語急則  
爲去聲耳

那 廣韵云奴臥切後漢書韓康傳公是韓伯休那  
注云那語餘聲也音乃賀反又李太白詩萬戶垂  
楊裏君家阿那邊阿助辭那何也阿那邊猶云何  
處也又蜀主王衍醉妝詞那邊走者邊走莫厭金  
盃酒那邊方言彼處也又通作奈顧氏日知錄云  
六朝人多書奈爲那三國志注文欽與郭淮書曰  
所向全勝要那後無繼何宋書劉敬宣傳令我那  
驃騎何唐人詩多以無奈爲無那愚按如杜子美  
詩杖藜不睡誰能那王摩詰詩強欲從君無那老  
是也

乍 忽也遽也孟子今人乍見孺子將入於井漢書  
王尊傳一尊之身三期之間乍賢乍佞豈不甚哉  
庾子山哀江南賦乍風驚而射火又王仲初詩乍  
到宮中憶外頭此乍字猶甫也今謂初到曰乍到  
也又元微之詩乍可沉爲香不能浮作瓠又云乍  
可爲天上牽牛織女星不願爲庭前紅槿枝乍可  
寧可也

藉 與借同設辭也詩大雅借曰未知亦既抱子史  
記陳涉世家藉第令毋斬而戍死者固什六七漢  
書蘇林注云藉假也張曲江封事借如諸司清要

之職當用第一之人及其要官闕時或以下等叨  
進借如假若也

諒 廣韵云信也愚按信也良也水經注漢石經北  
有晉辟雍行禮碑是太始二年立其碑中折但世  
代不同物不停故石經淪缺存半毀幾駕言永久  
諒用撫焉又通作亮左太冲魏都賦亮曰日不雙  
麗世不兩帝古詩君亮執高節賤妾亦何爲

向 後漢書段熲傳本規三歲之費用五十四億今  
適持年所耗未半而餘寇殘燼將向殄滅梁簡文  
帝謝竹火籠啓池水始浮庭雪向飛向已也向得



爲已者向往也往已然者也轉相訓又吳志華覈  
傳軍興已來已向百載已向重言也又白香山詩  
得作羲皇向上人許棠詩難問開方向前事向上  
已上也向前提已前也又後漢書張衡傳向使能瞻  
前顧後援鏡自誠則何陷於凶患乎向使猶假使  
也又通作嚮韓退之進平淮西碑文表嚮使撰次  
不得其人文字曖昧雖有美質其誰觀之

當 丁浪切王仲初詩收盡邊旗當日來當日卽日  
也

尚 爾雅云庶幾也郭注云詩曰不尚息焉疏云尚

謂心所希望也鄭箋云尚庶幾也以心所念尚卽是庶幾義相反覆故引之愚按尚是心所貴重如易高尚其志是也心所貴重卽是心所冀望故得轉爲庶幾也然書傳所用義有不同如書大禹謨爾尚一乃心力其克有大勲大學尚亦有利哉此尚字庶幾之辭也如詩小雅有苑者柳不尚息焉者言此苑然者柳無亦將止息於斯也不猶無也疑辭也尚猶將也尚得爲將者庶幾亦有將義也左傳襄公二十九年先君若有知也不尚取之言先君若有知無亦將取叔侯於地下治之義與詩

同以詩爲庶幾息焉猶可通也若傳豈可云庶幾  
取叔侯於地下治之乎顧氏補正云服虔云不尚  
尚也言先君當取叔侯於地下治之不尚尚也者  
小爾雅無念念也無寧寧也之例然義殊不備且  
以不尚爲當亦似牽強如詩豈可云茫然者柳當  
止息乎又詩大雅雖無老成人尚有典型孟子  
吾尚病此尚字猶也心所念尚有不斷之義故  
爲猶也又漢書淮南王傳非王尚誰立者太史公  
報任安書如僕尚何言哉尚何言哉此尚字猶復  
也更也又通作上詩國風上慎旃哉朱傳云上猶

尚也

況 廣韵云矧也愚按義轉而益進則云況也說文云矧況也詞也本作殊從矢引省聲從矢取詞之所之如矢然則矧況義同而其辭緩急有別如詩矧可射思其辭急孟子況於爲之強戰其辭緩也又詩小雅每有良朋況也永歎毛傳云況茲也愚按茲與滋通益也況義轉而益深故又得爲滋益之辭詩言以爲急難則不如兄弟雖有良朋益增歎惋也鄭箋以茲爲此蓋誤解毛義如晉語今子曰中立況固其謀彼有成矣注訓況爲益是也又

古作兄漢樊毅華嶽碑君舉必書兄乃盛德

浪 猶漫也杜子美詩將詩莫浪傳又云附書元浪  
語李義山詩浪笑榴花不及春浪笑浪傳輕脫之  
辭也浪語虛枉之辭也

長 直亮切多餘之辭漢書高帝紀十年夏五月太  
上皇后崩如淳云王陵傳楚取太上皇后爲質又  
項羽歸太公呂后不見歸媼也又上五年追尊母  
媼爲昭靈夫人高后時乃追尊爲昭靈后耳漢儀  
注高帝母兵起時死小黃北後於小黃作陵廟以  
此二者推之不得有太上皇后崩也曹灼曰五年

追尊先嫗曰昭靈夫人言追尊則明其已入史記  
十年春夏無事七月太上皇崩葬櫟陽宮明此長  
五月太上皇后崩八字也

竟 廣韵云終也漢書張湯傳吳楚已破竟景帝不  
言兵後漢書逸民傳帝曰于陵我竟不能下女邪  
世說汪衡懷一刺遂至漫滅竟無所詣皮襲美詩  
醉鄉終竟不聞雷終竟重言也又李義山詩鶯花  
啼又笑畢竟是誰春畢竟猶究竟也又溫飛卿詩  
昨日歡娛竟何事竟卽究竟省言之也又史記趙  
世家及索兒竟無聲陳丞相世家及呂后時事多

故矣然平竟自脫此竟字亦是終竟之辭然與上義別若云初不意其如此而終乃如此也

更復也再也左傳僖公五年虜不臘矣在此行也晉不更舉矣魏志華佗傳更呼佗李義山詩武夷洞裏生毛竹老盡曾孫更不來又史記秦本紀願君以利息召呂卻呂卻至則更入重耳此更字亦與再義近凡事改爲之則曰更如何亦曰再如何言先且如彼而後乃如此也又戰國策臣以失令過期更不用侵辱教王之惠也注云更反也侵辱刑也言已宜服刑王反不刑而教之惠按用以也

用侵辱教者以侵辱爲教誨也更收圖也與前義  
違故得爲反也如後漢書馬援傳李孟嘗折愧子  
陽今更其陸陸欲往附之杜元凱左傳序古今言  
左氏春秋者多矣今其遺文可見者數十家大體  
輒相祖述進不成爲錯綜經文以盡其變退不守  
丘明之傳於丘明之傳有所不通皆沒而不說而  
更唐引公羊穀梁適足自亂諸此更字其義竝同  
又世說王謂劉曰卿更長進水經注蝥水名也俗  
以是水爲沙水故亦名之爲沙城非也又城處水  
之陽而以陰爲稱更用惑焉杜子美詩更覺良工



心獨苦南唐後主清平樂詞離恨恰如春草更行更遠還生此更字猶益也愈也

正 與政通史記五帝紀象鄂不懌曰我思舜正鬱陶後漢書更始傳韓夫人尤嗜酒每侍飲見常侍奏事輒怒曰帝方對我飲正用此時持事來乎世說丞相嘗夏月至石頭看庾公庾公正料事王右軍帖足下今年政七十邪此正字猶適當也言正直其時也又世說謝太傅問諸子姪子弟亦何預人事而正欲使其佳又殷中軍云自然無心於稟受何以正善人少惡人多此正字猶常也又世說

正賴絲竹陶寫此正字常也端也又漢書惠帝紀  
鬼薪白粲應劭云擇米使正白爲白粲廣陵厲王  
傳胥宮園中棗樹生十餘莖莖正赤燕刺王傳前  
日一男子詣關自謂故太子長安中民趣鄉之正  
謹不可止此正字猶大也易說卦爲大赤大赤是  
正赤故知正亦得爲大也凡色不雜糅方不偏畸  
者曰正正是純全之義如正謹之正亦謂衆謹齊  
同其聲非小故正爲大也又論語正唯弟子不能  
學也唯語助正唯猶云卽如此便如此也言夫子  
以爲所能不過學不厭教不倦兩事便是此二事

弟子學不到也陶淵明詩御冬足大布麗紕以應  
陽正爾不能得哀哉亦可傷正爾卽正雅也又漢  
書王莽傳嚴尤奏言貉人犯法不從騶起正有它  
心宜令州郡且尉安之師古云假令騶有惡心亦  
當且慰安愚按假令猶縱使也正得爲卽故亦得  
爲縱今云卽使如何是縱令如何也如漢書終軍  
傳且鹽鐵郡有餘臧正二國廢國家不足以爲利  
害魏志王粲傳善屬文舉筆便成無所改定時人  
常以爲宿構然正復精意覃思亦不能加也吳志  
孫奮傳又中書楊融親受詔勅所當恭肅云正自

不聽禁當如我何諸此正字其義竝同又漢書循  
吏傳正頗重聽何傷酷吏傳丈夫爲吏正坐殘賊  
免追思其功效則復進用矣一坐軟弱不勝任免  
終身廢棄無有赦時世說今年破賊正爲奴又云  
五相末年略不復省事正封籙諾之又云殷覲病  
困者人政見半面又云正索解人亦不可得又云  
令史受杖正從朱衣上過又云政當無復近日事  
不又云此正小人有意向耳又云正自爾馨襄陽  
耆舊傳莫作孔明擇婦正得阿承醜女諸正字猶  
止也正得爲止者卽之轉也凡一物有二三名曰

曰某物卽某者言止是此物非有二也

令設辭也史記竇田傳太后怒不食曰今我在也  
而人皆藉吾弟令我百歲後皆魚肉之矣張釋之  
傳令他馬固不敗傷我乎

幸冀幸也義與庶幾相近漢書高帝紀諸侯王幸  
以爲便於天下之民則可矣文帝紀願大王幸聽  
臣等

徑猶直也史記滑稽傳髡曰賜酒大王之前執法  
在傍御史在後髡恐懼俯伏而飲不過一斗徑醉  
矣世說王徑裴許不通徑前杜子美詩過客徑須

愁出入

定 的辭也史記高帝紀聞陳王定死因立楚後懷  
王孫心爲楚王吳志華嚴傳定聞陸抗表至成都  
不守世說卿云艾艾定是幾艾庾子山蕩子賦聞  
道夫壻定應廻李義山詩人間定有崔羅什

賸 與剩同餘辭也杜子美詩剩欲提携如意舞皮  
篋美詩剩欲與君終此志溫飛卿詩剩欲一名添  
鶴寢剩欲猶云唯欲唯獨也只也祇也祇餘此故  
云剩也李義山詩景陽宮井剩堪悲韋莊詩異鄉  
聞樂剩悲涼此剩字祇也又庾子山蕩子賦前日

漢使著章臺聞道夫壻定應迴手中還欲燥愁眉  
卽剩開卽應時也剩多餘也言但有開眉更無餘  
戚也又杜牧之詩賸有新年歸否江南綠草迢迢  
此剩字若云尚也尚是冀望餘情故剩可借爲尚  
也

應 猶卽也魏志陳思王傳僕常好人譏彈其文有  
不善者應時改定華佗傳若當灸不過一兩處每  
處不過七八壯病亦應除若當針亦不過一兩處  
下針言當引某許若至語人病者言已到應便拔  
針病亦行差吳志朱桓傳桓督領諸將周旋赴討

應皆平定

又復也更也左傳文公十六年姑又與之遇以驕之漢書賈誼傳其異姓負彊而動者漢已幸勝之矣又不易其所以然溫飛卿詩又因明易號將軍入漢書疏廣傳且夫富者衆之怨也吾旣以教化子孫不欲益其過而生怨又此金者聖王所以惠養老臣也故樂與鄉黨宗族共饗其賜此又字猶云且也又書禹貢導沅水東流爲濟入于河溢爲榮東出于陶丘北又東至于荷又東北會于汶又北東入于海此又字更端之辭也又書君奭在



今予小子旦非克有正廸惟前人光施于我冲子  
又曰天不可信我道惟寧王德延天不庸釋于文  
王受命此又字轉語猶云抑也言予小子非能矯  
正啓廸以前人光施于冲子也抑謂天命靡常不  
可倚信惟期寧王之德是延使文王既受之命不  
釋於天耳又君奭惟文王尚克修和我有夏亦惟  
有若毓叔有若闕大有若散宜生有若泰顛有若  
南宮括又曰無能往來茲廸獎教文王茂德降于  
國人此又字設辭猶云若也言文王修和有夏者  
賴此五臣往來廸教也若謂此五臣不能往來廸

教文王亦無德以降于國人矣又得爲設辭者抑  
之轉也又多方主曰我不惟多誥我惟祇告爾命  
又曰時惟爾初不克敬于和則無我怨既云王曰  
復云又曰者乃篇末重申告誡之辭如云重曰復  
曰也與君夷爾又曰其義全別又戰國策臣又知  
其思與不思誠思則將吳吟劉辰翁云在家訓有  
爲又則又亦有也此言有以知之

驟

序也史記周本紀召公曰昔吾驟諫王

就

廣訪云卽也書數繁殷之卽喪指乃功不無戮

于爾邦孔傳云言殷之就卽指汝功事所致汝不

得無死戮于殷國必將滅亡立可待漢書武帝紀  
縣鄉卽賜無贅聚師古云卽就也各遣就其所居  
而賜之勿會聚也愚按就亡者卽時亡也孔傳所  
謂立可待者也漢紀云卽賜者亦是卽時頒賜之  
義恐其停留則贅聚人衆耳無戶戶就予之理也  
卽高帝詔云諸侯子及從軍歸者甚多高爵吾數  
詔吏先與田宅及所當求於吏者亟與爵或人君  
上所尊禮久立吏前曾不爲決甚亡謂也與此義  
同卽就皆辭也師古作實字訓耳又魏志荀彧傳  
前討徐州威罰實行其子弟念父兄之耻必人自

爲守無降心就能破之尚不可有也辛毗傳就與  
孫劉不平不過令吾不作三公而已蜀志法正傳  
亮歎曰法孝直若在則能制主上今不東行就復  
東行必不傾危矣此就字設辭猶云縱也又左傳  
襄公十一年就用命焉杜注云就能也

任 聽其如何不以屑意也杜審言詩柳葉開時任  
好風沈端節虞美人詞一任落花飛絮兩悠悠

暫 左傳僖公三十三年武夫力而拘諸原婦人暫  
而免諸國杜注云暫卒也愚按卒卒同猶云俄時  
也暫者常之反故得爲卒也王右軍帖當其快然

自足覓得於已覓與暫同又漢書李廣傳暫騰而上胡兒馬此暫字猝也忽也忽亦非常之義故可轉爲暫也